

Iskustvo sa kreditom Partner MKF za energetska efikasnost

Zahvaljujući projektu poboljšanja energetske efikasnosti ove zime sve prostorije u kući Vidovića tople

Slavko i Ana Vidović iz sela Brestovsko u općini Kiseljak, ovu zimu su dočekali sa puno funkcionalnijim i ekonomičnijim sistemom grijanja u svom domu, u kojem su sve glavne prostorije tople. Vidovići su ugradili etažni sistem grijanja gdje je osnovni izvor toplote posebna peć u dnevnom boravku koja služi za kuhanje i pečenje, kao i zagrijavanje ove i ostalih prostorija u kući, ukupne površine od 65 kvadratnih metara.

Izgradnju porodične kuće supružnici su do sada većim dijelom finansirali kreditima Partner mikrokreditne fondacije čiji su dugogodišnji klijenti. U fazi završnih radova, kada je na red došlo rješavanje pitanja grijanja, uzeli su namjenski Partnerov kredit za poboljšanje energetske efikasnosti individualnih domaćinstava u Bosni i Hercegovini. Ovaj kreditni proizvod uveden je uz tehničku pomoć Green for Growth Fund, Jugoistočna Europa (GGF). Zahvaljujući ovoj investiciji, uz istu potrošnju drveta, osnovnog energenta, zagrijavaju skoro cijelu kuću i osiguravaju potrebnu količinu tople vode za svoje domaćinstvo koju stalno imaju na raspolaganju.

„Prošle zime je toplo bilo samo u dnevnom boravku i to dok se loži, a sada su i ostale prostorije dovoljno zagrijane tokom cijelog dana. Najvažnije mi je da naši mali sinovi, Antonio i Andrej, sada mogu i zimi boraviti u svojim sobama, učiti i igrati se“, kaže Ana Vidović.

Još mogućnosti za uštede i povećanje komfora

Zadovoljna domaćica sada ima puno manje posla oko loženja i čišćenja peći, a koristeći istu toplotnu energiju sprema jelo za svoju porodicu.

Supružnici znaju da kod njih ima još prostora za poboljšanja na polju energetske efikasnosti. Uz radove koje planiraju obaviti dobiće još jeftinije grijanje, popraviće kvalitet stanovanja i dati svoj doprinos smanjenju zagađenja zraka uzrokovanog loženjem tradicionalnih čvrstih goriva u svojoj sredini.

„Na spratu kuće ću uraditi unutrašnju izolaciju, ugraditi novu stolariju i prekriti podove odgovarajućim termoizolacionim materijalima. Na kraju ću obložiti i vanjske zidove stiroporom“, najavljuje Slavko Vidović, Anin muž, koji porodicu izdržava obavljajući sezonske građevinske poslove i na mnogim primjerima se uvjerio u korist koja se može time ostvariti. Kako je ovo već peti kredit koji su uzeli od Partner mikrokreditne fondacije, nakon što ga otplate, buduće radove Vidovići opet namjeravaju finansirati sredstvima koja će podići kod Partnera.

Kroz ovaj projekat došlo je do značajne promjene okruženja, povećanjem svijesti o ekološki prihvatljivim sistemima za zagrijavanje i utopljanje objekata, a izvršeno je povezivanje sa drugim projektima koji rade na povećanju svijesti o energetska efikasnosti.

Slike 1 i 2: Ana Vidović, Kiseljak

